

Naalakkersuisut attartornermut peqqussutip allannguuteqartinnissaat, ineqarnermut akiliineq bankip qaammatini ulloq kingulleq ammaffianut nuunnissaanut aalajangiiffisassatut siunnersuut.

(Inatsisartuni ilaasortaq Justus Hansen, Demokraatit)

Akissuteqaat

(Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoq)

Aappassaanneerpeqarnera

Naalakkersuisut sinnerlugit Sanaartornermut Ataatsimiititaliaq isumaliutissiissuteqarneranut qutsavigaara.

Sanaartornermut Ataatsimiititaliap isumaqatigissup siunnersuutip akuerineqarnissaanik inassuteqarnera Naalakkersuisut tusaatissatut tiguaat – isumaliutissiissummiillu issuaavunga:

”Ataatsimiititaliap taamaalilluni paasivaa, attartornermut peqqussutip taassungalu atatillugu inatsisinit tunngasut attuumassutillit allanngortinnissaannut arlaleriarluni kissaateqartoqartarsimagaluartoq, maluginiarneqarporli susoqarsimangitsoq.

Ullut 14-ikkaarlugit akissarsiallit ikiorserneqarsinnaanerannik periarfissamik ajornartorsiut ataatsimiititaliap aamma isummersorfigaa, ataatsimiititaliamiilli annertunerusumik aaqqiissutissaq qanillatorneqarsinnaasimangilaq.

Inatsisissap suliarineqarneranut atatillugu ullut 14-ikkaarlugit akissarsialinnut aaqquissuussinerusinnaasut Naalakkersuisunit isumaliutigineqarsinnaanerannik paasinnilluni siunnersuut akuerineqassasoq ataatsimiititaliap isumaqatigiittup inassutigaa.”

Inatsisartuni ilaasortat eqqaamagunagaattut, siunnersuutip siullermeerneqarnerani Naalakkersuisut inassutigaa, siunnersuummi Akiitsut akiitsunillu akilersuisarneq pillugu Nassuiaatip attartortarnermut inatsimmut ilanngunneqarnissaa utaqqimaarneqassasoq, innuttaasut akiitsuisa akilinngitsuukkat qaffannginnissaat ajornanngippallu akiitsut akilinngitsuukkat apparnissaat qulakkearniarlugu pissutsit arlallit allanngortinneqarsinnaammata.

Naalakkersuisut UKA 2017-imut allannguutissatut siunnersuummik saqqummiussisinnaapput.

Paasinninneq isumaliutissiissummi saqqummiunneqartoq innersuussutigalugu, matumuuna siunnersuutip akuerineqarnissaa Naalakkersuisut inassutigaa.